

† Sigisbert Berther, Langnau/Camischolas

3.3.1978

m 18



(Corr.) Avon cuort temps ei serimnau in grond conduct da bara sil santeri à Langnau agl Albis. Leu han ins surdau alla fossa las restonzas terrestras da nies amitg Sigisbert Berther, da Camischolas. Cun il bien bab, fargliuns, la consorta ed affons dil defunct havein nus amitgs da scola – cun aunc in grond diember d'enconuschents ed amitgs – dau adia per adina ad in dils nos. Per nus dall'annada 1931 eisi in eveniment deplorabel, stuend constatar che gia sis da nos scolars han bandunau nus aschi baul. Quei ei ina raschun da sefermar, schar la lavour e patratgs profans agradiu e far zacontas ponderaziuns.

Il cuors dalla veta da nies Sigis, ch'il scribent emprova da resumar, muossa a nus buca mo tgi, mobein era tgei che nus havein piars. Per il bab, che stat tgeuamein agl ur dalla fossa, eisi in da ses affons ch'el ha educau, nutriu, vestgiu e preparau per la veta. Per ses fargliuns che sesentan bandunai, ei il trapassau staus in frar ch'ha gidau a tener ensemene la barca suenter che quella veva piars bein baul il tgamun. La mumma da quella famiglia ha nummadamein stuiu bandunar ses cars strusch ch'il Sigis era ord scola. E staus anavos ei in bab inschignus ch'ha capiu da direger vinavon exemplaricamein la famiglia. Secapescha che mintgin ha stuiu metter maun vid la lavour. Ruasseivlamein ha ei giu inum surmuntar beinenqual difficultad. Ils deletgs mundans éran rars. Mo ina cardientscha nunballucconta, plantada da siu bab, ha dau la direcziun alla finamira da nies amitg. Franc haveva el planisau aunc bia. Nus cartein denton segir ch'el hagi acceptau il destin ch'il Scaffider ha giu cun el.

Ils chirurgs e miedis – als quals il Sigis ha surdau siu tgierp buca meins che sis gadas

– han ludau la curascha ed ein stai plein smarvegl pervia da sia pazienzia duront la malsogna. Era la consorta ha adina puspei admirau la gronda fidonza. Gest cheu lein nus inaga ponderar. Con sensibels essan nus enqualgadas, sch'il vent trai buca spert avunda, ni sch'in'unda donnegiescha levet la barca. Bien Sigis, Ti has mussau a nus da dominar la veta, era en muments hanai. Bugen lein nus sere-gurdar da Tei en quei senn.

Ella baselgia sil crest da Langnau agl Albis ha il plevon, al qual nies Sigis ha giu confidau patratgs e quitaus, saviu consolar la famiglia en malencurada cun in riug commuentont. Gia avon in liung temps hagi il Sigis confirmau che la veta seigi destinada per el cuortamein. Ils plaid «Jeu crei fermamein che Jesus Cristus, che ha adossau a mi la crusch, vegni per mei» dattan perdetga da sia cardientscha e fidonza. Sil crest da Langnau agl Albis rauassa el ussa. Per nus eis el staus in bien exempl.

Il Sigis ei naschius ils 13 d'octobre 1931. El ha passentau ils onns da scola a Sedrun. Ils meins da primavera era el si mises, la stad ad alp ed igl atun gidava el a finir las lavurs sil funs. Suenter ils onns da scola ha el gidau a gudignar u en plaza ni ei segidaus el menaschi puril a casa. Duront dus onns ha il Sigis purtau mellis pacs e brevs per las casas. «In flot pot» a Sedrun, schevan las mattauns. Denton, il Sigis era buca propri cunteints senza in mistregn. Pér suenter haver fatg la scola da recrut ha el giu la pusseivladad da far in emprendissadi ella mazlaria Lozza a Mustér. La demanza e curteseivladdad da quei stupent mazler han schau avanzar el beinspert a cau d'ina filiala a Thalwil. Ursula Bommer ha gudignau il cor dil mazler. Cun quella stupenta dunna ha el fundau famiglia. Duas buobas ha il Señer schenghegiau ad els.

Igl atun vargau ha il Sigis visitau per la davosa gada sia glieud da Camischolas. El ha priu cumiau da sia Val, da mises ed alps. El ha aunc fatg beinenqual excursiun duront las vacanzas. Quei che curreva e passava en sia stretga patria, interesava el fetg. Scurlond il tgau ha el detg «Fo mu empau». Conta raschun che Ti has giu, sa il scribent pér oz. Alla damonda «Cu voi?» rispunda il Sigis: «Flot, flot, vo schon». Ina cumentientscha admirabla.

Bien Sigis, Ti has bandunau dunna ed affons, bab e fragliuns, Tia Val, mo era Tes amitgs che vegnan franc a seregurdar da Tei el far ed urar. Stai bein!

Tes amitgs e conscolars